

le Ciel. On vient nous aduertir fur l'heure, ce petit innocent ne fut pas pluſtoſt ondoyé dans les eaux ſacrées du Bapteſme, qu'il receut au meſme moment, & la vie du corps & de l'ame.

Vn autre enfant dans le berceau, dont le pere & la mere eſtoient morts excellens Chreſtiens, deuant tomber dans les foins d'une ſienne tante infidele, fut porté à dix lieuës de nous où cette tante demeuroit, & où bien toſt on le vit atteint à la mort. Les Infideles preſſent fortement cette femme d'auoir recours à des remedes diaboliques. Non, leur dit-elle, c'eſt vn enfant deſtiné pour le Ciel, & le voyant à l'agonie, Dieu des Chreſtiens, s'écria-t'elle, ie ne vous connois pas, mais ie vous offre cette petite baptifée, puis qu'on dit qu'elle eſt voſtre fille; ſi ceux qui enſeignent le chemin du Ciel eſtoient [44] icy, ils luy diroient quelle route doit tenir ſon ame à la fortie du corps; vous qui eſtes ſon pere conduifez-la vous meſme, crainte qu'elle ne s'égare: pour moy i'enterreray ſon corps en vn lieu ſeparé, & il n'aura rien de commun avec les Infideles. Cette petite ame innocente eſt maintenant dedans le Ciel, & celle qui luy auoit rendu ces charitez ſans quaſi les connoiſtre, nous vint trouuer de ſon païs par deux ou trois diuerſes fois, nous fit entendre ſon deſir, & enfin receut le Bapteſme avec tant de conſolation, qu'alors ſon cœur ſe répandant par ſes levres, Mon Dieu, s'écria-t'elle, feroit-il poſſible que iamais ie m'oubliaſſe de ce iour, & des ſaintes promeſſes que ie viens maintenant de vous faire, rien ne vous eſt caché, & vous voyez dans le fond de mon ame que pluſtoſt ie foulerois aux pieds mille coliers de porcelaine, que de commettre vn peché contre vous.